

**TEZAUUR LITURGIC**  
**5 FEBRUARIE**

**ACATISTUL**  
**SF. IERARH**  
**TEODOSIE**  
**UGLIŢKII,**  
**ARHIEPISCOPUL**  
**CERNIGOVULUI**



**MOSCOVA, 2000**



# Акафист

## СВЯТИТЕЛЮ ФЕОДОСИЮ, архиепископу Черниговскому, чудотворцу

### Кондак 1

---

Избранный чудотворче, великий угодниче Христов, святителю отче Феодосие, нетлением мощей твоих и множеством чудес от Бога прославленный, в песнях радостных ублажаем тя, заступника нашего. Ты же, яко имеяй дерзновение ко Господу, от всяких нас бед свободдай, да зовем ти:

Радуйся, угодниче Божий, святителю Феодосие, чудотворче преславный.

### Икос 1

---

Ангел во плоти явился еси, богомудре Феодосие, ангельскими нравы измлада себе украшая; темже и Ангел церкви Черниговския достойне поставлен был еси от Бога, всех

наставляя ко спасению и всем являя в себе правило веры и образ кротости, воздержания же и любви. Сего ради, чада твоя суще, любовию вопием ти сице:

Радуйся, Ангеле земный и человеке небесный;  
радуйся, небесных сил собеседниче и сослужителю.

Радуйся, в житии твоём безплотным поревновавый;

радуйся, и по смерти с ними водворивыйся.

Радуйся, от юности Христа всем сердцем твоим возлюбивый;

радуйся, от утра жизни твоея Тому единому поработавый.

Радуйся, вся заповеди Господни верно и непорочно сохранивый;

радуйся, мног плод духовный о Христе сотворивый.

Радуйся, усердною молитвою дух твой окриливый;

радуйся, чтущих любовию память твою от бед покрывающий.

Радуйся, угодниче Божий, святителю  
Феодосие, чудотворче преславный.

### **Кондак 2**

---

Видев суету мира сего скорогибнущую, всем  
сердцем возжелал еси, отче Феодосие, мир сей  
оставити и во иночестве Богу послужити. Темже  
иго Христово благое и легкое усердие восприяв,  
инок святыя обители Киево-Печерския смирен и  
послушлив был еси, воспевая всех Творцу  
ангельскую песнь: Аллилуиа.

### **Икос 2**

---

Разум богопросвещенный твой видев,  
святитель Киевский Дионисий постави тя,  
Феодосие, архидиакона соборныя церкви Софии  
Премудрости Божией, да служиши алтарю  
Господню при совершении Таин Божиих. Мы  
же, в тебе избранный сосуд Духа Святаго  
ведуще, со умилением зовем ти сицевая:

Радуйся, под кровом чудотворцев Печерских  
начало подвигов твоих положивый;

радуйся, от юности добродетельми  
монашескаго жития преизрядно себе  
украшивый.

Радуйся, иноков пресветлая красото;

радуйся, постников преславная похвало.

Радуйся, святителей благоговейных любимый  
собеседниче;

радуйся, послушания нелицемерный  
рачителю.

Радуйся, подвижниче смиренный, на Господа  
все упование возложивый;

радуйся, уединенного жития добрый  
ревнителю.

Радуйся, избранниче Христов преблаженный;  
радуйся, Богом данный нам заступниче  
непреборимый.

Радуйся, угодниче Божий, святителю  
Феодосие, чудотворче преславный.

### **Кондак 3**

---

Сила Божия осени тя, отче Феодосие, егда во  
иерея посвящен был еси от святителя Дионисия  
и во игумена обители Корсунския от него  
поставлен, да пасеши Христово стадо и  
руководиши иноки ко спасению, воспевая купно  
с ними хвалебную песнь в Троице славимому  
Богу: Аллилуиа.

---

## Икос 3

Имея смирение нелицемерное, прах и пепел себе именовал еси, преблаженне Феодосие, и запрещение от архиерея, неповинен сый, безропотно понесл еси; темже и мы, ублажающе таковое, воистину хриstopодражательное, незлобие твое, воспеваем тебе сице:

Радуйся, агне незлобивый, никомуже зла за зло воздавый;

радуйся, яко запрещение архиерейское нося, послушание великое явил еси.

Радуйся, яко тогда и епитрахили коснуться не дерзал еси;

радуйся, смирением и преданием себе в волю Божию врага победивый.

Радуйся, иноче боголюбезный, преподобием и кротостию благоукрашенный;

радуйся, постническим житием, яко безкровным мученичеством увенчанный.

Радуйся, монашествующим отец и наставник богомудрый;

радуйся, обителей иноческих многоопытный руководителю.

Радуйся, Престола Божия верный и благоговейный служителю;

радуйся, пред Богом теплый о нас ходатаю.

Радуйся, угодниче Божий, святителю Феодосие, чудотворче преславный.

#### **Кондак 4**

---

Бурю гонений на Церковь Божию во граде Киеве воздвиже мудрование латинское; ты же, богомудре Феодосие, во игумена обители Выдубецкия тогда поставлен быв, сию от лжеучения оградил еси, утверждая братию свою в православней вере непорочно воспевати Богу: Аллилуиа.

#### **Икос 4**

---

Слышав богоугодное житие твое, отче Феодосие, святитель Божий Лазарь, призва тя от Киева в Чернигов и, поставив во архимандрита пречестныя обители Елецкия, сотвори помощника себе во управлении церковнем; ты же с любовью сыновнею послужил еси ему и воистину достоин явился еси, да воспеваем ти сицевая:

Радуйся, старцу святителю с любовью послуживый;

радуйся, яко сын отцу во всем ему послушен  
бывый.

Радуйся, старость его упокоивый;

радуйся, труды святительския ему  
облегчивый.

Радуйся, благолепия церковнаго усердный  
рачителю;

радуйся, преданий апостольских верный  
хранителю.

Радуйся, правды ревностный блюстителю;

радуйся, долга пастырска непоколебимый  
исполнителю.

Радуйся, алтаря Господня служителю  
непорочный;

радуйся, пастырем светлый образе.

Радуйся, угодниче Божий, святителю  
Феодосие, чудотворче преславный.

### **Кондак 5**

---

Боготечную звезду, к горнему Иерусалиму  
путеводящую и добродетельми светло сияющую,  
зряще тя, предивный Феодосие, иноцы же и  
мирстии с любовью последоваху тебе,  
внимающе твоему учению душеполезному и

взирающе на образ чистаго жития твоего, поучахуся взывати с тобою Богу, дивному во святых Своих: Аллилуиа.

### **Икос 5**

---

Видев себе святитель Лазарь старостию преутруждена и в силах телесных изнемогша, возжела имети тя, Феодосие, преемника по себе во святительстве и проси Святейшаго Патриарха Московскаго посвятити тя во архиепископа. Мы же в сем Божие звание, еже на тебе, уразумевающе, любовь прославляем тя сице:

Радуйся, архиерею Божий, от Предвечнаго Архиерея дивно предызбранный;

радуйся, Апостолов достойный преемниче и усердный ревнителю.

Радуйся, святителю Христов, от собора святителей российских освященный;

радуйся, иерарше благий и нищелюбивый.

Радуйся, архипастырю милостивый и сострадательный;

радуйся, святителем Митрофану и Димитрию собеседниче и сопрестольниче.

Радуйся, архиереев православных красото;  
радуйся, пастырю добрый, душу твою за  
овцы положить готовый.

Радуйся, учителю златословесный;  
радуйся, богосветлый светильниче Церкви  
Христовы, во тьме века сего возсиявший.

Радуйся, угодниче Божий, святителю  
Феодосие, чудотворче преславный.

### **Кондак 6**

---

Проповедник не словом точию, но и делом  
явился еси Христова учения, святителю  
Феодосие, яко пастырь добрый, по образу  
Пастыреначальника Христа всех с любовью  
наставляя ко спасению, всем образ жития по  
заповедем Христовым подавая и всех поучая  
взывать присно Богу: Аллилуиа.

### **Икос 6**

---

Возсиял еси, яко утро светозарное, стране  
Черниговстей, святителю Божий Феодосие, и  
паству, тебе вверенную, светом добродетелей  
твоих озарил еси, смирением высокая стяжавая  
и нищету иноческую соблюдая; вся бо, яже имел  
еси, неимущим усердне раздавал еси. О сем

дивящися, яко нищелюбца совершеннаго  
ублажаем тя, зовуще:

Радуйся, милосердия источниче  
неисчерпаемый;

радуйся, сирым прибежище благонадежное.

Радуйся, вдовицам милостивый покровителю;

радуйся, алчущих неоскудный питателю.

Радуйся, обидимым скорый заступниче;

радуйся, скорбящим благонадежный  
утешителю.

Радуйся, сущим в бедах готовый помощниче;

радуйся, младенцем добрый воспитателю.

Радуйся, юношам и девам в целомудрии  
наставниче;

радуйся, старцем и немощным твердое  
укрепление.

Радуйся, угодниче Божий, святителю  
Феодосие, чудотворче преславный.

### **Кондак 7**

Хотя всем сердцем твоим единому Господу  
благоугождати, подвигом добрым до конца  
подвизался еси, Феодосие, труды к трудом во

смирении прилагая, постом и бдением с молитвою плоть твою умерщвляя и любовь всех согревая. Темже и сподобился еси еще на земли достойно и праведно воспевати ангельскую песнь Богу: Аллилуиа.

## Икос 7

---

Новаго тя молитвенника и чудотворца предивнаго яви Господь в стране Российстей, святителю отче Феодосие; темже и светло красуется тобою Церковь Православная, яко дерзновение велие ко Христу имаши, Емуже молися, святителю, о нас грешных, любовь тебе вопиющих сицевая:

Радуйся, пресветлый светильниче веры православныя;

радуйся, православия страже неусыпающий.

Радуйся, благочестия ревностный поборниче;

радуйся, Церкви Божия столпе непоколебимый.

Радуйся, храмино добродетелей приукрашенная;

радуйся, безстрастия и чистоты ревнителю преизрядный.

Радуйся, молитвы сокровище неистощаемое;  
радуйся, таин Божиих верный строителю.

Радуйся, паству твою в вере и благочестии  
соблюдая;

радуйся, со святыми сликования в Небесном  
Царствии сподобивыйся.

Радуйся, угодниче Божий, святителю  
Феодосие, чудотворче преславный.

### **Кондак 8**

---

Странствие земное богоугодне совершив,  
святителю отче Феодосие, свято и праведно  
почил еси о Господе сном смерти, яже бысть  
тебе прохождение от трудов на покой вечный;  
приял бо еси от Христа Бога венец славы  
нетленный и водворился еси со святыми  
воспевати Ему вечно хвалебную песнь:  
Аллилуиа.

### **Икос 8**

---

Весь еси любовь неоскудевающая, святителю  
Божий Феодосие; якоже бо в житии сем, тако и  
по преставлении к Богу чад твоих не  
оставляеши; на всех, к тебе верою  
притекающих, милостивне призираеши,

болящим исцеление подавая, скорбящих утешая,  
от бед избавляя. Сего ради, благодарни суще,  
воспеваем ти сице:

Радуйся, нищету духовную от юности  
возлюбивый;

радуйся, Христу в меньших братиях Его  
верно послуживый.

Радуйся, двери милосердия Божия нам  
отверзающий;

радуйся, гнев Божий, праведно на ны  
движимый, на милость прелагающий.

Радуйся, по отшествии твоем к Богу с нами  
пребывающий;

радуйся, умерщвленные грехами души  
благодатию Христовою оживляющий.

Радуйся, источниче сострадания к людям  
приснотекущий;

радуйся, омраченных заблуждениями  
благостный просветителю.

Радуйся, с небесных высот на скорби наши  
призирающий;

радуйся, всех нас любовью твоею  
объемлющий.

Радуйся, угодниче Божий, святителю Феодосие, чудотворче преславный.

### **Кондак 9**

---

Вси людие черниговстии прославиша Бога, егда услышаша о преславном явлении твоём, святителю Феодосие, преемнику твоему архиепископу Иоанну, егоже от недуга тяжка исцелил еси, являя дерзновение твое ко Господу. Сего ради и потщася гроб твой благоукрасити и подобие лица твоего над ним поставити, зовый дивному во святых Своих Богу: Аллилуиа.

### **Икос 9**

---

Витии многовещаннии не возмогут восхвалити тя по достоянию, вечныя славы достойнаго, святителю отче Феодосие; и кто может поведати многая и преславная чудеса твоя, яже источил еси от нетленных мощей и икон твоих святых; о сем убо радуящеся и Бога, святых Своих прославляющаго, славяще, вопием ти сице:

Радуйся, в пресветлых райских чертозех обитающий;

радуйся, нетлением мощей твоих зарю общаго воскресения нам предпоказующий.

Радуйся, в видениях во благо верующим являющийся;

радуйся, в сонних на молитву к твоему ходатайству призывающий.

Радуйся, слезы и въздыхания скорбящих с любовью утворяющий;

радуйся, прошения труждающихся и обремененных скоро исполняющий.

Радуйся, от внезапныя смерти верных избавляющий;

радуйся, данныя Богу обеты исполняти побуждающий.

Радуйся, слепым прозрение, глухим слышание подающий;

радуйся, отче чадолюбивый, якоже кокош под криле, духовная чада твоя у гроба твоего собирающий.

Радуйся, угодниче Божий, святителю Феодосие, чудотворче преславный.

### **Кондак 10**

Спасение вечное унаследовал еси, святителю Феодосие, и светло ныне ликуеши со Ангелы и всеми святыми, присно созерцая пресветлое

лице Христа Бога нашего, Егоже молити не престай за ны грешныя, да твоим заступлением сподобимся купно с тобою воспевати Ему: Аллилуиа.

## Икос 10

Стена ограждения в Церкви Православней являешия, святителю Божий, множеством дивных чудес твоих верная утверждающая и явлением силы Божиея вся еретическая мудрования отражающая; наставников бо раскола нетлением мощей твоих зело удивил еси и исповедати истину православия возбудил еси. Темже со страхом и благоговением вкупе с верными взываху ти сице:

Радуйся, прославлением мощей твоих всех нас радости исполнивый;

радуйся, нетлением телесе твоего неверие глаголемых старообрядцев в веру претворивый.

Радуйся, ересь штунды чудесы преславными посрамивый;

радуйся, жену от люторовы ереси крестное знамение православне полагати научивый.

Радуйся, младенцу слепому у мощей твоих внезапно прозрение даровавый;

радуйся, немотствующий язык помазанием  
елея от лампы твоея разрешивый.

Радуйся, тем же елеем струпы неисцельныя  
исцеляяй;

радуйся, близ смерти сущих болящих к жизни  
возвращаяй.

Радуйся, яко лишении разума у мощей  
твоих благодатию Христовою исцеляются;

радуйся, яко и пелены от гроба твоего  
чудодействуют.

Радуйся, угодниче Божий, святителю  
Феодосие, чудотворче преславный.

### **Кондак 11**

---

Пение молитвенное не умолкаше у мощей  
твоих, святителю Феодосие, от дне погребения  
даже до дне прославления твоего со святыми,  
егда собор святителей Церкви Российской со  
славою из пещеры мощи твоя изнесе и в  
соборней церкви града Чернигова на общее  
поклонение честне положи. Приими убо и наше  
смирненное пение хвалебное и помози нам  
покаянием очиститься, да во исполнении  
заповедей Христовых преуспевающе и тобою

наставляеми, с тобою благодарственне вопием Богу: Аллилуиа.

## Икос 11

---

Светильник благодатный быв в житии твоём, святителю Феодосие, тихим светом смирения и любви на свещнице Церкви Христовы сияющий, и по преставлении твоём возсиял еси, яко солнце, предивными чудесы мглу раскола и ересей разгоняя и верных сердца к Богу обращая. Темже, с любовью празднующе святую память твою, вопием ти:

Радуйся, звездо лучезарная, над землею черниговскою возсиявшая;

радуйся, и всю страну Российскую светом своим озарившая.

Радуйся, града Чернигова славо и ограждение;

радуйся, всея земли нашея страже неусыпный и тёплый молитвенниче.

Радуйся, у Престола Царя царствующих за царя нашего предстательствующий;

радуйся, яко имя твое по всей стране нашей от конца в конец прославляется.

Радуйся, яко явлению твоими неверныя в веру православную обращаеши;

радуйся, яко чудеса твоими инославныя к православию наставляеши.

Радуйся, яко с небесными силами присно Богу воспеваеши;

радуйся, яко на небесех выну славу Его созерцаеши.

Радуйся, угодниче Божий, святителю Феодосие, чудотворче преславный.

### **Кондак 12**

---

Благодати Божией сосуд избранный был еси, святителю Феодосие; благодать Божию и в помощь немощи нашей испроси у Господа, да сею благодатию спасаеми, присноборющия ны страсти победим, и тою укрепляеми, Подателя всех благ Господа Иисуса всегда с тобою прославляем, зовуще Ему: Аллилуиа.

### **Икос 12**

---

Поюще многая и преславная чудеса твоя и прославляюще великия подвиги твоя, святителю отче наш Феодосие, со умилением сердца славим, хвалим и величаем возвеличившаго тя

Господа, в тебе явльшаго нам новое знамение  
Своего благоволения к Церкви Православней,  
яко вечному столпу и утверждению истины; тебе  
же, яко теплому предстателю нашему пред  
Богом, возглашаем сицевая:

Радуйся, в вертограде Господни от утра до  
вечера жизни твоея добре потрудивыйся;

радуйся, в радость Господа своего, яко раб  
благий и верный, вшедый.

Радуйся, житием твоим путь в обители  
небесныя нам показавый;

радуйся, венцем безсмертия и славы  
небесныя увенчанный.

Радуйся, неба церковнаго звездо пресветлая;

радуйся, земли Российския похвало  
пречудная.

Радуйся, яко со всеми святыми в горних  
обитаеши;

радуйся, яко и нас грешных на земли  
любовию посещаеши.

Радуйся, имже Христос прославися;

радуйся, имже сатана посрамися.

Радуйся, угодниче Божий, святителю Феодосие, чудотворче преславный.

### **Кондак 13**

---

О великий угодниче Божий и чудотворце, святителю отче наш Феодосие! Приими сие малое моление наше, в похвалу тебе, аще и недостойне, обаче с любовью сыновнею приносимое, и умоли Господа Бога избавитися нам от всяких бед, скорбей и напастей, от междоусобных брани и внезапных смерти, и от мучений вечных в будущем веце, и сподобитися в вечней жизни с тобою воспевати Ему: Аллилуиа.

Этот кондак читается трижды, затем 1-й икос «Ангел во плоти ...» и 1-й кондак «Избранный чудотворче ...».

### **Молитва**

---

О священная главо, крепкий наш молитвенниче и заступниче, святителю Феодосие, услыши нас, с верою призывающих тя и усердно припадающих к раце честных и многоцелебных мощей твоих (или: иконе твоей). Поминай нас у Престола Вседержителя и не престай молиться за ны. Вемы, яко грехи наши

разлучают нас между нами и тобою, и недостойни есмы толикаго отца и ходатая. Но ты, быв подражатель человеколюбия Божия, не престани вопия о нас ко Господу, испроси предстательством твоим у Всемиловитейшаго Бога нашего мир Церкви Его, на земли воинствующей, пастырем ея силу ревностно подвизатися о спасении людей. Умоли Небеснаго Отца всем нам подати дар, коемуждо благопотребен, веру истинную, надежду твердую и любовь неоскудевающую, градов наших утверждение, мира умирение, от глада и пагубы избавление, от нашествия иноплеменников сохранение, юным и младенцем благое в вере возрастание, старым и немощным утешение и подкрепление, болящим исцеление, сиротам и вдовицам милость и заступление, заблуждшим исправление, бедствующим благовременную помощь. Не посрами нас в уповании нашем, споспешествуй, яко отец чадолюбивый, и нам понести иго Христова во благодушии и терпении, и всех управи в мире и покаянии непостыдно скончати живот свой и Царствия Божия наследником быти, идеже ты ныне водворяешия со Ангелы и всеми святыми,

прославляя Бога, в Троице славимаго, Отца и Сына и Святаго Духа. Аминь.



**ПОЛНЬІЙ  
АКАФИСТНИК  
КАНОНИЧЕСКІЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

І

НОВОЕ  
\* НЕБО